



Datë: 09.07.2025
Numër Protokolli: 4782/2025

A.nr.821/2025

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosjen e Ankesave në përbërje nga: Malsore Gashi Bajraktari, kryetare, Eshref Shabani dhe Ardita Haxhnikaj Demi, anëtarë, me Atdhe Gashi në cilësinë e procesmbajtësit, ka shqyrtuar ankesën me numër A.nr.821/2025, të datës 05.05.2025, të parashtruar nga ankuesja V.Z-I, të cilën me autorizim e përfaqëson Avokat Enis Dema nga Kaçaniku, kundër organit të punësimit: Sekretariati i Këshillit Gjyqësor të Kosovës, në çështjen juridike “*kompensim material*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 09.07.2025, mori këtë:

V E N D I M

I. Refuzohet si e pabazuar ankesa me numër A.nr.821/2025, e datë 05.05.2025, e parashtruar nga ankuesja V.Z-I.

II. Mbetet në fuqi Vendimi me numër referencës DS-166/2025, i datës 26.03.2025, i Drejtorit të Përgjithshëm të Sekretariatit të Këshillit Gjyqësor të Kosovës.

A r s y e t i m

Nëpunësja civile, V.Z-I (*tutje referuar* ankuesja), më datë 28.04.2025 përmes postës ka parashtruar ankesë për Këshillin e Pavarur Mbikëqyrës për Shërbimin Civil të Kosovës, e cila është pranuar më datë 05.05.2025, kundër Vendimit me numër referencës DS-166/2025, të datës 26.03.2025, të Drejtorit të Përgjithshëm të Sekretariatit të Këshillit Gjyqësor të Kosovës.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 20.05.2025 ka dërguar kërkesën për përgjigje në ankesë tek Sekretariati i Këshillit Gjyqësor të Kosovës (*tutje referuar SKGJK*), ndërsa Këshilli më datë 23.05.2025 ka pranuar përgjigje, me shkresat e bashkangjitura.

Kryetari i Këshillit pas pranimit të kërkesës së Kryetares së Kolegjit për Shqyrtimin dhe Vendosjen e Ankesave, përmes Vendimit VK/2025 dhe numër protokolli 4153/2025, të datës 18.06.2025, ka shtyrë afatin për vendosje të ankesës me numër A.nr.821/2025 edhe për dhjetë (10) ditë pune

Kolegji për Shqyrtimin dhe Vendosjen e Ankesave, administroi këto prova: Ankesën me numër

protokolli 2962/2025 të datës 05.05.2024, e parashtruar nga ankuesja në Këshillin e Pavarur Mbikëqyrës për Shërbimin Civil të Kosovës; Vendimin me numër referencës DS-166/2025, të datës 26.03.2025, të Drejtorit të Përgjithshëm të SKGJK-së; Dëshminë për pranim të aktit e datës 01.04.2025; Vendimin KGJK.nr.01/2023 të datës 18.01.2023 të Këshillit Gjyqësor të Kosovës; Kërkesën për pagës të diferencës së pagës e datës 11.03.2025 nga ankuesja për Këshillin Gjyqësor të Kosovës; Akt Emërimit e datës 01.07.2024; Listën e pagave shkurt 2023, dhe korrik e shtator 2024; Autorizimin e datës 12.02.2025; Kërkesën për përgjigje në ankesë e datës 19.05.2025; Përgjigjen në ankesë e datës 23.05.2025; Listat e pagave të ankueses.

Kolegji për Shqyrtimin dhe Vendosjen e Ankesave pasi ka shqyrtuar të gjitha shkresat e bashkangjitura të lëndës të parashtruara nga palët në procedurë, ka konstatuar se ankesa e ankuesja **është pabazuar**, sepse:

Nga administrimi i shkresave të lëndës, rezulton se ankuesja fillimisht sipas Akt Emërimit Nr. Reference: DS-701/2024 të datës 01.07.2024, është e punësuar në pozitën e punës *Referente* në Gjykatën Themelore në Ferizaj-Dega Kaçanik në kuadër të SKGJK-së, Klasa Profesional 1, J15, koeficient të pagës 5.85.

Si rrjedhojë, ankuesja përmes përfaqësuesit të saj të autorizuar, më datë 11.03.2025, i është drejtuar më kërkesës Këshillit Gjyqësor të Kosovës, duke kërkuar diferencën e pagës prej muajit shkurt 2023 respektivisht prej muajit korrik 2023 deri në qershor 2024, konkretisht për periudhën kohore nga muaji korrik deri në muajin dhjetor 2023 diferencën e koeficientit të pagës nga 5.3 në 5.85 x 105 Euro, ndërsa nga muaji janar deri në muajin qershor 2024 diferencën e koeficientit të pagës nga 5.3 në 5.85 x 110 Euro, mbi bazën ligjore sipas Vendimit KGJK. nr.01/2023 të datës 18.01.2023.

Drejtori i Përgjithshëm i SKGJK-së, më datë 26.03.2025, ka nxjerr Vendimin me numër reference DS-166/2025, me të cilin ka refuzuar në tërësi kërkesën e ankueses si të pabazuar.

Ankuesja, në ankesën e parashtruar në Këshillin e Pavarur Mbikëqyrës për Shërbimin Civil të Kosovës, kundër Vendimit me referencës DS-166/2025, të datës 26.03.2025, të Drejtorit të Përgjithshëm të SKGJK-së të cilin sipas dëshmisë e ka pranuar më datë 01.04.2025, pretendon se akti i kundërshtuar me ankesë edhe nxjerr si rezultat i vërtetimit jo të plotë dhe të gabuar të gjendjes faktike she aplikimit jo të drejtë të së drejtës materiale, ngase Këshilli Gjyqësor i Kosovës më datës 18.01.2023 ka nxjerr vendim për klasifikimin e vendeve të punës për të punësuar në gjyqësor ku pozita e Referentit është klasifikuar në klasën profesional 1, grupi J, klasa J15, koeficienti 5.85, ndërsa ky vendim nuk është zbatuar deri në qershor të vitit 2024 edhe përkundër faktit që nuk ka pasur ndonjë akt që e pezullon zbatimin e tij, andaj e njëjta kërkon që të aprovohet ankesa dhe të anulohet akti i kundërshtuar me ankesë dhe të bëhet kompensimi i diferencës së pagës nga klasa profesional 2 nga koeficienti 5.3 në klasën profesional 1 në koeficientin 5.85 nga muaji korrik 2023 deri në muajin qershor 2024.

Kolegji i Këshillit, konstaton se Kuvendi i Republikës së Kosovës, ka miratuar Ligjin Nr. 08/L-196 për Pagat në Sektorin Publik (i zbatueshëm nga data 05.02.2023), ndërsa me qëllim të implementimit të kësaj ligji, Këshilli Gjyqësor i Kosovës, më datës 18.01.2023 ka nxjerr Vendimin KGJK. nr.01/2023, për klasifikimin e vendeve të punës për të punësuarit në gjyqësor, ku sipas kësaj vendimi janë përcaktuar grupi, klasa dhe koeficientit për çdo pozitë, e për rrjedhojë sipas pikës 15 të kësaj vendimi janë përcaktuar pozitat e klasës profesional 1 grupi J, Klasa J15 dhe koeficientit 5.85, ndër pozitat e përfshira në këtë klasë ka qenë edhe pozita Referent që mban ankuesja, e renditur me numër 15.22.

Lidhur me shqyrtimin e pretendimeve ankimore të ankueses, Kolegji i Këshillit, ju referuar Ligjit Nr. 08/L-196 për Pagat në Sektorin Publikë, përkatësisht nenin 2, paragrafi 1, 2 dhe 3, në lidhje me fushëveprimin ku parashihet se: *''1. Ky ligj zbatohet për të punësuarat/it në sektorin publik pagat e të cilave/ëve financohen nga dhe përmes buxhetit të shtetit, 2. Rregullat dhe kushtet për përcaktimin e pagës të të punësuarave/ëve në sektorin publik janë ekskluzivisht rregullim i kësaj ligji dhe mund të rregullohen edhe me akte të tjera nënligjore, vetëm kur parashihet shprehimisht nga ky ligj. 3. Për nëpunëset/it në Presidencën e Republikës së Kosovës, Gjykatën Kushtetuese të Republikës së Kosovës, Sistemin e Drejtësisë, Kuvendin e Republikës së Kosovës, dhe institucionet e pavarura kushtetuese, ky ligj zbatohet për aq sa nuk cenon pavarësinë e tyre funksionale dhe organizative të garantuar me Kushtetutë''*, dhe nenin 14, paragrafi 3, të kësaj ligji ku përcaktohet se: *3. Klasifikimi i një pozite të caktuar të shërbimit civil, bëhet në bazë të rregullave të vlerësimit dhe klasifikimit të pozitave të punës, sipas dispozitave për klasifikimin e pozitave të shërbimit civil, në pajtim me legjislacionin në fuqi për zyrtarët publik, dhe rrjedhimisht, referuar kësaj përcaktimi ligjor, Kolegji i Këshillit konstatoi se paga bazë e nëpunësit civil të Sistemit Gjyqësor përcaktohet sipas klasës së pagës, përkatësisht koeficientit, të cilit i përket pozita e punës, e klasifikuar në shtojcën Nr.2 të Ligjit Nr.08/L-196 për Pagat në Sektorin Publik, ndërsa klasifikimi i një pozite të caktuar të shërbimit civil, bëhet në pajtim me legjislacionin në fuqi për zyrtarët publik dhe rregulloren e brendshme të aplikueshme për klasifikimin e vendeve të punës në Sistemin Gjyqësor.*

Kolegji i Këshillit, nga analizimi i shkresave të lëndës, ka gjetur se organi i punësimit, gjegjësisht Këshilli Gjyqësor i Kosovës, sipas Vendimin KGJK. nr.01/2023 të datës 18.01.2023, ka përfunduar klasifikimin e vendeve të punës në sistemin gjyqësor, mirëpo procedimi i pozitës së ankueses në sistemin e ri të pagave, të krijuar sipas Ligjit Nr.08/L-196 për Pagat në Sektorin Publik, nuk është si pasojë e klasifikimit të pozitës së saj të punës, në kuptim të ligjit material, gjegjësisht Ligjit përkatës për Zyrtarët Publikë dhe rregullat e brendshme të Këshillit Gjyqësor të Kosovës, por si rezultat i zbatimit të Vendimit Nr.04/128 të datës 16.02.2023, të Qeverisë së Republikës Kosovës lidhur me ekuivalencën e sistemit të vjetër me sistemin e ri të klasifikimit të koeficienteve me qëllim të llogaritjes së pagës bazë, e në këtë rast pozita Referent në SKGJK, ka qenë duke u paguar me koeficientin shtatë (7) dhe në bazë të ekuivalentimit të sistemit të vjetër të pagave me sistemin e ri, pozita e ankueses nga hyrja në fuqi e Ligjit Nr. 08/L-196 për Pagat në Sektorin Publikë është ekuivalentuar në klasën profesional 2, me koeficient 5.3, për rrjedhojë duke marr parasysh Vendimin Nr.04/128 të datës 16.02.2023, të Qeverisë së Republikës Kosovës, ka qenë e pamundur të bëhet zbatimi i Vendimit KGJK. nr.01/2023 të datës 18.01.2023 të Këshillit Gjyqësor të Kosovës, ngase sipas vendimit të cekur më lartë të Qeverisë së Republikës së Kosovës ky vendim është zbatuar për të gjitha institucionet për të cilat aplikohet Ligji Nr. 08/L-196 për Pagat në Sektorin Publikë.

Duke marr parasysh faktin se institucionet e Sistemit të Drejtësisë, kanë të drejtë që të nxjerrin aktet e brendshme të tyre për të punësuarit në këtë sistem, atëherë Këshilli Gjyqësor i Kosovës më datë 06.06.2024, ka miratuar Rregulloren Nr. 02/2024 për Klasifikimin e Vendeve të Punës për Nëpunësit Civile në Administratën e Sistemit Gjyqësor, e për rrjedhojë Kolegji, konstaton se sipas nenit 26 të kësaj rregulloreje është përcaktuar përshkrimi i përgjithshëm i punës, klasat dhe emërtesat për kategorinë profesional 1, e ku ndër pozitë është përfshirë edhe pozita e ankueses Referent sipas Grupit J, Klasat J15, Koeficienti 5.85, dhe mbi bazë të kësaj rregulloreje të njëjtës i është lëshuar edhe Akt Emërimi me numër Reference DS-701/2024 të datës 01.07.2024, dhe nga kjo datë e lëshimit të aktit të emërimit, ka filluar se zbatuari edhe realizimi i pagës sipas koeficientit 5.85.

Andaj lidhur me pretendimet ankimore të ankueses për kompensim të diferencës së koeficientit të pagës nga klasa profesional 2 nga koeficienti 5.3, në klasën profesional 1 në koeficientin 5.85 nga muaji korrik 2023 deri në muajin qershor 2024, Kolegji i Këshillit, konstaton se pretendimet e tilla nuk kanë mbështetje ligjore, për faktin se siç elaboruam më lartë, procedimi i pagës sipas sistemit të ti të pagave të përcaktuar sipas Ligjit Nr.08/L-196 për Pagat në Sektorin Publik, është bërë si rezultat i zbatimit të Vendimit Nr.04/128 të datës 16.02.2023, të Qeverisë së Republikës së Kosovës dhe jo si rezultat i Vendimit me Nr.01/2023 të datës 18.01.2023 të Këshillit Gjyqësor të Kosovës për klasifikimin e vendeve të punës ngase i njëjti nuk ka mundur të zbatohet për shkak të rrethanave juridike të krijuara sipas Ligjit Nr. 08/L-196 për Pagat në Sektorin Publik dhe Vendimit Nr.04/128 të datës 16.02.2023, të Qeverisë së Republikës së Kosovës, për rrjedhojë edhe kompensimin për periudhën e pretenduar nga ankuesja nuk mund të realizohet, kështu që lidhur me ligjshmërinë e vendimit të kundërshtuar me ankesë gjegjësisht Vendimit me referencës DS-166/2025, të datës 26.03.2025, të Drejtorit të Përgjithshëm të SKGJK-së, Kolegji i Këshillit, konstaton se ky vendim është nxjerr si rezultat i konstatimit të drejtë të gjendjes faktike dhe juridike, duke vepruar në plotëni me nenin 47 dhe 48 të Ligjit Nr. 05/L-031 për Procedurën e Përgjithshme Administrative, kështu që i njëjti nuk plotëson asnjë nga kushtet ligjore për tu konsideruar akt i paligjshëm, rrjedhimisht pretendimi i ankueses është i pabazuar.

Andaj, bazuar në nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të kësaj vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e kësaj vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.821/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dërgohet:

- Përfaqësuesit të autorizuar të ankueses, Avokatit Enis Dema;
- Njësisë për Menaxhimin e Burimeve Njerëzore të Sekretariatit të Këshillit Gjyqësor të Kosovës; dhe
- Arkivit të KPMSHCK-së.